

Philipp Rösler – da l'uffant fugitiv al vicechancelier tudestg

DA JOHANN ULRICH SCHLEGEL

■ **Il 1973 è vegnì purtà en segirezza in uffant chattà da gnanc in onn or da la Guerra dal Vietnam sanguinosa en Germania. Quai che cumenza sco in miracul cuntinuescha cun ulteriuras miraclas.** Adina danovamain sa maschaidan la fortuna e la disfortuna: fortuna per l'uffant d'avair chattà geniturs adoptivs bainstants, disfortuna per lur lètg e famiglia ch'è ida en stgaglias. Ma danovamain ha il mat, ch'è en il fratemp registrà sco Philipp Rösler en Germania, fortuna extraordinaria: el crescha si e vegn tgirà d'in bun bab nutridor, frequenta senza difficultads tut las scolas, daventa medi, politicher e la finala minister da la regenza federala tudestga. Ils 18 da matg 2011 ha la chanceliera Angela Merkel nominà Rösler per decret sco ses substitut ed uschia sco vicechancelier da la Germania.

Naschi en la Guerra dal Vietnam

Il 1954 ha gi lieu a Geneva la conferenza internaziunala, a chaschun da la quala il Vietnam è vegnì dividì en ina part al nord comunista ed en ina part al sid liberal-occidental. In onn pli tard cumenzan ils partisans communistes en il Vietnam dal sid, ils uschenunads Vietcongs, ina guerra civila che finischa en la Guerra dal Vietnam disfamada. Per ils Stadis Unids d'America era questa guerra sco ina smanatscha da lur interess occidentals. Els han en consequenza intervègnì en ils cumbats guerrills ed han bumbardà a partir dal 1965 las vias da refurniment presuntivas en il Vietnam dal nord. En il sid èn els entrads en acziun cun truppas a terra, las qualas els han augmentà fin il 1967 a quasi in mez milliun umens. A partir da l'onn 1970 han ils Stadis Unids da l'America cuntinuà lur attatgas cun bumbardar e devastar ils stadis vischins Cambodscha e Laos. Per finir è la guerra però stada ina gronda disditga per l'America. Ella è ida a fin ils 30 d'avrigl 1975 cun l'occupaziun da Saigon, la chapitala dal Vietnam dal sid, entras furmazions communistas dal sid e dal nord. La chapitala conquistada è vegnida renunada tenor il manader nordvietnamais Ho Chi Minh en Ciudad Ho-Chi-Minh. L'America ha stuì sa retrair turpegiusamain cun fasch e fagot. La bilantscha da la Guerra dal Vietnam è sgarschentusa: ils cumbats guerrills han chaschunà var trais milliuns morts, da quels dus terzs persunas civilas. Quatter milliuns umans èn vegnids blessads grevamain. E gist durant quel temp snuavel, insacura il favrer



Philipp Rösler, il nov vicechancelier tudestg.

da l'onn 1973 – uschia vegni supponì – è Philipp Rösler naschì. Nagin na sa, schebain ses agens geniturs han survivì, nua ch'èn tut tenor lur fossas u co ch'els han gi num. Tschert è ch'ina persuna nunenconuscenta ha gi cumpassiu cun l'uffantin bandunà e pers ed al ha dà giu en ina chasa d'orfens catolica da Khanh Hung, in lieu situà en il sid da la citad da Soc Trang en il delta dal Mecong betg lunsch davent da Saigon. La chasa d'orfens n'exista oz betg pli. Il pitschen Vietnamais percenter è anc il medem onn vegnì manà ed adoptà da la famiglia tudestga Rösler da Hamburg.

L'uffanza en ina famiglia dischunida

Uffizialmain survegn el uss il num tenor il giavisch dals geniturs adoptivs ch'al numnan Philipp. Nomen est omen. Il num Philipp deriva dals retgs macedons da l'antica grecca e signifitga ami. Era quest num ha sias ragischs en l'ost ed è vegnì surprindì dal vest: la principessa russa Anna da Kiev è daventada entras la maridaglia cun Heinrich I regina da la Frantscha. Lur figl han els numnà Philipp. En consequenza da sia gronda popularità en Frantscha è il num daventà fitg enconuscent. E nagin na po negar che Philipp Rösler giuda oz en Germania medemamain ina ordvart gronda popularità.

En Germania survegn Philipp Rösler uss er ina data d'anniversari. Nagin na sa cura ch'el è naschì. Qua regna da-

novamain il birocratissem e decretescha la data da naschientscha senza far grondas per ils 24 da favrer 1973. Ils Rösler a Hamburg han duas figlias e cun Philipp uss er in figl. La mamma è tgirunza, il bab pilot da l'aviatica militara tudestga, pilot-instructor e commember da la SPD. La ventira en famiglia è dentant da curta durada. Midadas dal domicil strapatschan las francadas. Davent da Hamburg va la famiglia a star a Bückeberg, lura a Hannover. Cura ch'il pitschen Philipp ha quatter onns sa separa la famiglia. El vegn agiuditgà al bab ch'al educescha a moda militara severa. Philipp Rösler, uschia vegnì cità, possia sa regurdar bain da l'uffanza gia fitg tempriva: «Da questas manieras militaras na sun jau mai m'enrichià.» E Rösler cuntinuescha ch'er il bab na saja mai s'enrichià da quellas. Philipp Rösler, il minister d'economia odiern, il president da la FDP ed il vicechancelier da la Germania, è senza dubi in tip ordvart cuntent. Qua na fai betg surstar, sch'el agiunta: «Visavi la scola sa chatta la caserna e mangià hai jau sco uffant en il local da segiurn dals uffiziers. A chasa regiva in urden militar rigurus, i n'aveva pia nagut da la Villa Babilonia.»

L'odur da l'ester

Ma en el sa chatta er anc insatge ester ch'al gida a purtar tras la vita e ch'al na vegn mai a bandunar. En il Südwestrundfunk è el s'exprimì davart sia cum-

parsa exteriura: «Gia en scolina era jau conscient che jau vesia or auter. Mes bab ha da lezzas uras prendì mai per la spatla ed ha tschentà mai davant in spievel. 'So mes mat, sco quai che ti vesas, vesas ti or in pau auter.' E lura m'ha el declerà la raschun.»

Sin fundament da sia cumparsa asiatica è el cleramain stà expost a la crudaiudad d'uffants mai propi controllabla ubain superabla d'attatgar persunas che vesan or era mo in zic auter. Philipp Rösler, l'uffant diligent e sveglià, ha dentant er en quella situaziun pudì profitar da sia fermezza mitologica da ses esser different: «La tema latenta dals auters uffants che jau pudess far in sport da cumbat asiatic suspectus m'ha spendrà.»

Philipp Rösler n'è betg vegnì battegià d'uffant. Ma el po frequentar la scola luterana a Hannover. Là fa el il 1992 la matura. Influenzà dal bab entra el sco aspirant d'uffizier en l'armada da la Republica Federala Tudestga. El cumenza il studi da la medischina ch'el terminescha cun ina dissertaziun davart ils effects secundars d'operaziuns dal cor. Parallelamain a quella scolaziun ha el cumenzà a far en l'Ospital da l'armada da la Republica Federala Tudestga a Hamburg la scolaziun specialisada al medi dad egl. Amez quella scolaziun specialisada datti per Rösler danovamain ina gronda cesura en sia vita extraordinaria: el daventa politicher professiunal.

La carriera politica

Gia il 1992, l'onn da sia maturità, è el daventà commember da la FDP. Qua cumenza sia gronda carriera. El daventa tranter auter president dal circol e vegn elegi l'onn 2000 al secretariat general da la FDP da Niedersachsen. En in proxim pass daventa el deputà a la dieta ed uschia politicher professiunal. A medem temp sa posizionescha el sco politicher nazional. Il 2009 vegn el elegi sco minister e suppleant dal primminister da Niedersachsen. Sia carriera progredescha a moda rasanta. L'entschatta dal 2009 daventa el toppoliticher da Niedersachsen e la fin dal medem onn toppoliticher sin plaun nazional: el vegn tschernì sco minister da sanadad da Berlin.

Anc durant il studi emprenda Philipp Rösler d'enconuscher ina commilitona. Quella al ha persvadì l'onn 2000 da sa laschar battegiar e d'entrar en la Baselia catolic-romana. Il 2002 marida el questa dunna ch'è en il fratemp medemamain avanzada a la media dr. Wiebke Rösler. Il pèr ha duas figlias.

Sch'ins considerescha il talent extraordinari da l'anterior orfen da guerra da l'Orient Extrem, na surstat ins en sazez betg ch'el ha – suenter esser entrà en la Baselia – era fatg carriera en quel champ: Philipp Rösler è commember da la radunanza generala dal comitè central dals catolics tudestgs.

Il matg da quest onn ha Philipp Rösler pudì dar giu il ministeri da sanadad che n'è en general betg uschè stimà ed ha pudì surpigliar il ministeri d'economia pli pussant. A medem temp è el daventà il successur da Guido Westerwelle sco president da la fraziun nazionala da la FDP ed è vegnì designà, entras ina brev da la chanceliera Angela Merkel, ils 18 da matg 2011 sco vicechancelier da la Germania.

Philipp Rösler è in dals politichers da la Germania actuals ils pli extraordinaris. Nus stain cun el amez ina paraula ch'è pelvaira daventada realità. Ma Rösler sto era far frunt a malempervailadads, las qualas baud u tard mintga politicher inscuntra, dals rasisists zuppads ch'al insultan sco il Chinai fin a las intrigas ed als cumbats da partidas usitads e quotidian. Co po el, ch'è a medem temp in represchentant carismatic da l'exotic e da l'ester, tegnair la dira? Er en questa situaziun resta Rösler fidaivel a sia derivanza asiatica ed è s'exprimì a moda instinctiva e segira ed en ina grondezza sorprendenta, sco quai ch'el ha già fatg d'uffant areguard l'apparent sport da cumbat: «Ins sto chavaltgar il tigher senza sa laschar magliar dad el.»